

Kakayeshkimiwaywin La lway poor Aantor deu tout sort di mood Mamowitouwin



Nakishkatamoowin


Keetaywachikashoonaw chipeetoushi atoushkayahk ishpischee tapishkoot pawsi li tawn. Apray sawn zawn aen naw di shakouchihiwaywin pi mayitoutawkawowin ishi Li Promyee Nawsyoon, aen Niskimoo pi lee Michif li moond, kiyawaw tout awn sawmbl natounamahk chikishkayistamahk aen neu kaw-ishi itouchikawtayk kaykwuy aykwawnihi namowiya keestwawmi keema tahkinay shikishkihshihk kaw-pacheehkay di pawsi. Atoushkaywin chickenawayschikawtayk, pimawtishimakahk pi shimanawchihischik le mem pi naturel kawawshakawshkayhk kee-awawn pat keekischaymow Indigene Kishkayistamowin, Indigene li moon kee-ouhpimaen itishahwow see maezoun ouschi pi li territwayr akwa itayimawak namoo kwaayesh see pimawchihouwin pi ishi pimawchisoowin. Kinishtawinaynaw ooma si terrib li tawn'd kayawsh pi tout paray ishitayhtamahk aen tawn chimayshkoohtaashta.

Nipakoshayimoonawn aykwawnihi kaw-pimichishahikawtaykihk la lway ashtaw la foondawsyoon poor aen neu kaw-ishi itouchikawtayk di atoushkaywin chishoohkastayk ishi la pay kaw-oushtawhk, kakeekayhk pi mamowitouwin chickenawayschikawtayk, pimawtishimakahk pi shimanawchihischik species pi naturel kawawshakawshkayhk. Oohin lee plawn di la lway aykwawnihi chikee:

- awnkourazhee mamaawinitowin pi gischeetayimouwin, kiko aykwawnihi la foondawsyoon poor teestipahootayhk noo-Indigene pi Indigene kaw-ishi kishkayihchikawtayk;
- oushtawniwun maashkowimakan mawachihchikaywin kay-ishpayik aykwawnima nishtawinum aenportaan di Deu-zyeu wawpahchikaywin, pi kootaka nakiskumowina ishi 'teestipahootayhk' kishkayistamowin aen system;
- kayshchinahoow louvrazh poor Indigene li moond pi Okishkayistamowin ishi paminikayw see la tayr pi li territwayr, pi didawn en seksyoon di mawachihchikaywin.

Oohin la lway aykwawnihi kaykwuy ishpayihk di izhoongl nanawkatawayistamoowin pi kawpeekishkwaychikawtayk awnter Indigene Kishkayistamowin Awn Roun ouschi di Tooroon not Grawn Piyee Wawshakawmihk Aen Kariboo Kishkayistamowin Kaw-Mamamawitowhk lee mambr tawnsheeshi ouhchi chimiyeu atoushkaychik lout bor Indigene pi noo-Indigene kee-ishipimawchihounawniwun, en tayr di veu, pi ishi kishkayistamowin aen ishchikatayk ouschi di la pay kaw-oushtawhk. Kaykinikawtayk kaykwuy ishpayihk di igzaminee kakayeshkimiwaywin pi pleu miyeur ayshitouchikaywin ouschi kootaka mamowitowuk aykwawnihi meena kee-oushistaw la lway poor teestipahootayhk kishkayistamowin aen system pi en partineuz lout bot kee-ishipimawchihounawniwun. Oushtawniwun ishi Indigene chi Mawhcheemakun Natoutamawin poor Aen kariboo, kee-oushistaw ouschi Indigene Peekishkweewin Awn Roun Dawn la Nor Mayrik aen Kariboo Louvrazh aen Maezoon ishpee 2018.

Oohin la lway ay-ishchikatayk si li praensipal di ka-ishpayiwin awpachihchikan poor mawachihchikaywin-ouschipayiwun mamowitowina awnter Indigene pi noo-Indigene en partineuz. Ooma awpachihchikan chiashtaw boon sawn kakayeshkimiwaywin chi weechihiwayhk la fors chi pimoustatahk di la lway.



Kakayeshkimiwaywin La lway

Noushtouhtamowin di wawhkoostouwin avek aen kariboo

Nishtawinumowin pi kischaymowin nishtum ouschi kishkayistakwun ouschi di aen kariboo ishi Indigene li moond onishtawaymiwin, kaw-ishipimawchihounawniwun, pi didawn awtist chi-ishpayinwin li mawnzhee akouyikouhk pi li mawnzhee ayikwakun. Indigene li moond ayow wawhkoostouwin ishi la tayr pi soon pishkayimiawun chickenawayistahk poor aen kariboo yahkashtaw kwawshayhkamik maykwawt: aen kariboo keepamihiwayw poor wiyawow dan pawsi li tawn pi chiahkamay meena dan li taan ki vyayn.

Gisheetayimouwin poor la tayr kawtipayhtahk, lee treetee pi noushtouhtamowin ouschi wiya-ikouhk ashpayimouwin di Indigene nawsoon

Nishtawinumowin pi chickenawayhtamihk la nawsoon, wiya-ikouhk tipaymishouwin, pi wiya-ikouhk ashpayimouwin di Indigene li moond, pi nishtawinumowin aykwawnihi oohin chikee shasheepishiwin shawpou Indigene neekwaneewin di akwa nakahtoohkaywin didawn la tayr-ouschipayiwun nawashwaywina.

Wawhkoostouwin oushtaniwun didawn trostab

Outina li tawn si nissisayr chi oushistahk pi chickenawayhtamihk trostab, ayish ooma mitouni aenportaan ishi kaw ay-ishchikatayk miyeuweechaytouwin wawhkoostouwin aykwawnima geemiyikiw mamowitouwin nawashwaywina chi ayshkam. Mamowitouwin miyeu atoushkaymakun ishpee trostab kaw-oushistahk paarmi kahkiyuw lee mambr ouschi di en partineuz weechayhtouwin, avek a lawntour lee mambr chi paytahk i'lspre ouschi di balawns ishi peekishkwaywina.

Mamowitouwin pi en pawr la lway oushtawniwun

En pawr la lway oushtawniwun avek nishtawinumowin aykwawnima Indigene li moond paray ishitoutawtowin en partineuz ishi kawpaminuhk awpachichikana kaw-ashpayimouw. Mamowitooohkamawkaywin ishi moushkinayw len partineuz weechayhtouwin akwawnima awshakawmihk ouchihaywin, kee-ishipimawchihounawniwun, pi amihayshtoutawin akwa meena wawpaschikaywin/atoushkaywin kaw-itouchikawtayk. Mamowitouwin mawchistawn avek itashinihikataywin ooma nawashwaywin pi ahkamay shawpou ishko poonistawin, avek wawhkoostouwin kenawaychikawtayw ishpee nawashwaywina kee-poonipayin. La pay kaw-oushtawhk ay-ishchikatayk si li praensipal ouschi di miyeu en partineuz weechayhtouwin.

Klayr pi Pishkayimiawun

En pawr kahkiyuw ouphihwaywin, lee plawn, pi weehstamakaywin avek kahkiyuw shi-akimischik ouschi ishpee kaw-mawchistahk. Ane klayr mashnaykaywin lee louvrazh pi and pishkayimiawun akousheeshi mamowitouwak ishi pishkayimiawun poor mamouyiyawuk pi pikawna la lway oushtawniwun pi kay-ishpayik.

Nawnduw ishi Kawkishkayhtamouhiwayhk

Oushistahk paminikaywin poor wawweepat pi ahkamay kawkishkayhtamouhiwayhk awnter kahkiyuw shi-akimischik, avek kahkiyuw kaw- cheehkayistam a lawntour lee mambr, kiko outinikawtayw pikou tawnima la lawngaezh muwnayshkawkaywina awnter shi-akimischik. Kenawaychikawtayw miyeu wawhkoostouwin ishi wawweepat chiweestamahchik a lawntour lee mambr aykwawnima namowiya dret akouta ayow.

Mamaawinitowin pi en pawr weechihwaywina

Oushtawniwun aen mamouyiyawuk nawashwaywina, ita weechihwaywina kahliyuw en pawr. Awnbrasee mamaawinitowin avek aen pishkayimiawun chimiyikohk kahkiyuw kishkayistamowin aen system paray itaystamowin, pi oushtawniwun si pa rawr nishtouhtamowin ishi chiweechihwayhk mamouwi kishkaytamowin. Nishtawinumowin aykwawnima lee alawntour pat shawns chikee ayow ayish namatakoun ouschi awpachichikana pi ayspeeshchawk, pi atoushkakasytam en balawns power peetoush itayhtemowina awnter kahkiyuw mamowitouwin en partineuz.

En pawrd cheehkayistamowin

Kaw-mawchistahk ishpee di mamowitouwin nawashwaywin, kahkiyuw lee mambr, avek a lawntour lee mambr, chikee peekishwatahk pi paray itayhtem didawn itayimoowina, la valeu pi aen manyayr. Nishtawinumowin a lawntour see ayndawayishchikaywina pi aen kayshchinahoow oohin daw li miljeu ishi nawashwaywina.

Kikwamouwin ishi Li Promyee Nawsoon la lway di Tipayhtamowin, Paminikaywin, Kawschitinikaywin, pi Tipihchikaywin (OCAP®) poor Indigene kaw-weehstamakayhk

Kayshchinahoow aykwawnima Indigene lee a lawntour retain tipayhtamowin di, paminikaywin, kawschitinikaywin, pi tipihchikaywin ouschi di kishkayistamowin (avek koumaen kishkayistamowin), weehstamakaywin, pi kaw-weehstamakayhk, akwa kaw-mamouyiyawuk tipayhtamowin pikou tawnima weehstamakaywin ouschi scientific wawpaschikaywin kaw-weechihwaychik chi-paminikawtayk, igzaminee, keema chiashtaw nashkoumiwaywin ishi.

Gisheetayimouwin poor pi ouhtinamawkaywin ishi Indigene Kishkayistamowin, kaw-ishipimawchihounawniwun pi la veu

Shasheepishiwin peetoush itayhtemowin bimawtishinawniwun awnter Indigene pi noo-Indigene li moond pi la veu, kiko taashihkum kay-ishpayik ouschi di peekishkwaywina, wawpaschikaywin pi pikou tawnima mamowitouwin nawashwaywina. Nishtawinumowin aykwawnima Indigene Kishkayistamowin aen system pi kouman peekishkwewin aykwawnihi di paray la valeu ishi dan li West kishkayistamowin aen system pi itahtou aen system ayow soon ikouhk ayshitoutam chikawschitinahk, kayshchinahoohk pi en pawr kishkayistamowin.